



# Sanzman i komans avek ou

**M**wan prosen nouvo gouvènmàn i selebre son premye lannen o-pouvwar. Seselwa ti oule sanzman e lamazorite zot ti tik anler e donn LDS en mazorite absolli pou diriz Sesel pour sa prosen 5-an. Malgre nouvo gouvènmàn in erit en pei dan pli gro difikilte dan son listwar, bokou in ganny akonpli. Seselwa i osi konsyan rol ki sakenn de nou i annan pour zwe pou ed Sesel relans son lekonomi e pour lavi retourn normal.

Bokou keksoz in sanze dan sa pei me kisisa sanzman vremen? I senp; se fer keksoz dan en fason diferan. Ler nou fer keksoz diferaman, nou ganny rezilta diferan. Se prezizeman



*Mwan prosen pou fer enn-an depi ki Prezidan Ramkalawan in vin o-pouvwar*

sa ki nouvo ladministrasyon pe fer.

Ladministrasyon oparavan ti ensiste kit pei fermen pou protez Seselwa. Sa desizyon ti pe paraliz pei totalman. Ekonomikman, leta ti pe depanse pou soutenir tou biznes. Sa ti pe rin pei. Sosyalman, lefe advers lo

leta mantal pep Seselwa ti pe vin enkyetan. Sesel, en pei ki depan preski antyerman lo lenportasyon, ti pe komans santi lefe komodite manke lo marse. Menm pasyan ki ti bezwen tretman aletranze ti pe ganny afekte. Ozordi, plis ki zanmen, tou Seselwa pe realize ki desizyon pou reouver pei ti en nesosite absolli. Eski ou kapab mazin ki ben nou ti pou ladan si pei ti ankor fermen?

Gouvènmàn LDS in fer keksoz diferaman e nou pe ganny rezilta diferan. Apard lekonomi rebran pli vit ki ti anvizaze, lavi sosyal pe osi amelyore depandan lo tou lenfeksyon. I osi vre ki in annan viktim. Sa i regretan

me gouvènmàn in pran son responsabilite o-serye e met a dispozisyon tou Seselwa proteksyon atraver vaksinasyon e ledikasyon entansif lo en konportman responsab. Annou pa oublie pou dir sa kanpanny 'ou lasante, ou responsabilite' ti ganny lanse lontan avan LDS vin o-pouvwar. LDS i vremen oule ki tou Seselwa i pran zot responsabilite vizavi zot lasante e non pa depan antyerman lo gouvènmàn. Se sa sanzman ki LDS in toultan promouvwar.

I pran letan pour serten realize pou dir sa sanzman ki zot ti pe rode ti osi enkli en sanzman dan zot fason fer. Parey nou abitye dir: i komans avek ou!



# En lopinyon i senpleman en lopinyon



**O**zordi zour Sesel tou dimoun i annan en lopinyon. Tou dimoun i annan drwa eksprim li lo nenport ki size nasyonal san difikilte. Dan en demokrasi vi-bran parfwa i difisil pou separ laverite avek rimer. Sepandan sakenn de nou i annan en devwar rod laverite e pa zis azir koman en veikil ki zis pas lenformasyon ki ariv kot nou san verifikasyon.

Ler en endividi i ganny fer arete travay pour en rezon ou en lot, sakenn i fer son lopinyon san rode vre rezon aköz. Zeneralman politisyen dan lopozişyon pa enterese konpran en sitiasyon; zot plito enterese rod profi politik. Sa nou konpran. I zot fason fer pour esey enfliyans lopinyon piblik malgre zot kontinyelman fel.

Nou tou nou konnen ki servis piblik in toultan annan gro difikilte pou delivre en bon servis. I annan plis ki 20-an ki gouvèrnman anba US in lans kanpanya pour transform servis piblik me

san sikse. Transformasyon servis piblik in lo manifestò SPPF/Parti Lepep/US pour plizyer deseni me san okenn rezilta. Menm ansyen prezidan Danny Faure ti pe promet en meyer servis piblik dan son kanpanya avan Seselwa ti decide an-

voy li repoze.

Ozordi zour, lopozişyon pe konplent viktimizasyon dan servis piblik. Zot pe dir dimoun pe perdi travay malapropo. Eski zot krwar ki servis pou amelyore Sesel si menm group dimoun i kontinyen travay

parey avan dan servis piblik? Menm lopozişyon pour aksepte ki larepons i en gro NON. Eski tou sa lantrenman ki gouvèrnman in donner e pe kontinyen donner pou amelyor produktivite dan servis piblik in anmenn rezilta ki Seselwa i anvi? La ankor, larepons i en gro NON. Alor, sel fason pour anmann en sanzman reel dan servis piblik se servi profesyonnel konpetan avek en latitud pozitiv vizavi produktivite. I sertennman bezwen annan remanman ki pou anmenn nivo produktivite ki gouvèrnman i oule.

Lopozişyon pour toultan annan en lopinyon lo tou keksoz. Amelyorasyon dan servis piblik pou arive me nou bezwen les gouvèrnman fer sanzman neseler avan. I pa realis pour ekspekte en meyer servis san en sanzman lekip oubyen en sanzman latitud. Si latitud pa sanze, napa lezot swa apard sanz lekip.

## Nou bezwen realis

**S**emenn pase, gouvèrnman in bezwen pran en desizyon tre difisil tout an konesan ki sa desizyon pa ti pou popiler. Gouvèrnman in oblize ogmant pri pasaz bis piblik a en moman kot sitiasyon ekonomik pei i difisil e kondisyon finansyel bann fanmir Seselwa i osi pa fasil. Sa desizyon in bezwen ganny pran pour zisteman redres en anomali ki ti'n devret ganny adrese plizyer lannen pase.

Gouvèrnman Sesel in soutenir SPTC pour bokou lannen ; anfe preski 50 pousan depans sa lakonpanyen i ganny finanse par larzan piblik. Avek sa logmantasyon dan

pri bis, i ekspekte ki sa depandans lo gouvèrnman a redwir pour vin mwens ki 20 pousan.

Ka 'Air Seychelles' i en legzanp kler danze ki pei i kapab fer fas avek letan en antrepriz i kontinyelman ganny finanse par larzan piblik san bann kontrol neseler.

Sipor ki gouvèrnman i donn SPTC in kontinyelman ogmante sa bann dernyen lannen. Nanryen pa ti pour sanze si gouvèrnman pa ti pran en desizyon. Danze avek depandans lo bidze gouvèrnman se ki bann antrepriz i perdi liniyativ e tonm dan en letarzi. Souvannfwa, napa ase zefor pour ogmant produktivite e koup lo depans aköz gouvèrnman i ofer sekirite fi-



nansyer toultan. Pour pei progese ekonomikman, fason fer i bezwen sanze.

Parey Air Seychelles, SPTC i bezwen revwar son loperasyon e rod fason pou redwir depans e vin pli efikas. Konsomater i osi ekspekte en meyer servis e valer pour son larzan. Avek sa sitiasyon ekonomik difisil, ti enportan ki gouvèrnman i koup lo son depans. Sa a benefisye nou tou a lon term.